

## Evening Dogri (NSD)

27 Dec. 2025

### आकाशवाणी

1. प्रधानमंत्री नरेन्द्र मोदी हो'रें अज्ज नमीं दिल्ली च मुख सचिवें दे 5में राष्ट्री सम्मेलन दी प्रधानता कीती।
2. पच्छिम बंगाल च मतदाता सूचिएं दी बशेश नजरसानी यानि एस.आई.आर दी सुनवाई दा चरण अज्जै थमां शुरू होई गेआ ऐ। पूरे राज्य च 3 जहार 234 सुनवाई केंद्र बनाए गे न।
3. डी.जी.सीए दी जांच कमेटी ने इंडिगो दिएं डुआरिएं च रूकावटें बारे रपोर्ट सौंपी दिती ऐ।
4. खालसा पंथ दे संस्थापक श्री गुरु गोबिंद सिंह जी महाराज हुं'दा 359मां प्रकाश पर्व अज्ज समूलचे देशें च मनाया जा' रदा ऐ।
5. केई हफ्तें धोड़ी चली दिएं हिंसक झड़प्फें मगरा थाईलैंड ते कंबोडिया ने संघर्श विराम समझौते पर दस्तख्त करी दिते न।
6. ते क्रिकेट च मेलबोर्न क्रिकेट ग्राउंड च खेड्ढे गेदे एशेज श्रृंखला दे चौथे टेस्ट मैच च इंग्लैंड ने मेजबान अस्ट्रेलिया खलाफ ऐतिहासिक जित्त दर्ज कीती ऐ।

<><><><><><>

### PM Chief Secys Conf

प्रधानमंत्री नरेन्द्र मोदी हो'रें अज्ज नमीं दिल्ली च मुख सचिवें दे 5में राष्ट्री सम्मेलन दी अध्यक्षता कीती। ओह कल बी इस सम्मेलन दी अध्यक्षता करडन। जंदे रोज थमां

शुरु होए दे त्र'उं दिनें दे इस सम्मेलन दा मकसद राश्ट्री विकास सरबन्धी प्राथमिकताएं पर लगातार गल्लबात दे माध्यम कन्ने केंद्र ते राज्यें बशकार सांझ-भ्याली गी बढ़ावा देना ऐ। प्रधानमंत्री हुं'दे सहकारी संघवाद दे नजरिये पर आधारत एह सम्मेलन केंद्र ते राज्य गी इक सांझे मंच पर आहिन्नियै, देशै दी मनुक्खी पूंजी समर्थ ते समावेशिता गी बधाने ते भविक्ख च विकास दी रफ्तार तेज करने लेई संगठित रूपरेखा तैयार करग। इस सम्मेलन च 'विकसित भारत लेई मनुक्खी पूंजी' विशे पर ध्यान केंद्रित कीता जाहग, जेहदे च राज्यें ते केंद्र शासत प्रदेशें लेई सबनें शा बधिया प्रथाएं ते रणनीतियें गी शामिल कीता जाहग। इस दरान 5 प्रमुख खेतरें पर विस्तार कन्ने चर्चा कीती जाहग। एह खेतर न - शुरुआती बाल आवस्था, स्कूली ते उच्च शिक्षा ते कौशल विकास, खेड्ड ते पढ़ाई ते अलावा हो'र दुइयां गतिविधियां। इस सम्मेलन च 6 बशेश सत्र आयोजित कीते जा'रदे न जेहड़े राज्यें च विनियमन च ढिल्ल; शासन च प्रौद्योगिकी, स्मार्ट आपूर्ति श्रृंखलाएं, आत्मनिर्भर भारत ते स्वदेशी; ते वामपंथी उग्रवाद दे बाद आहले भविक्ख दिएं रणनीतियें पर केंद्रित न।

<><><><><><>

## SIR WB

पच्छिम बंगाल च मतदाता सूचिएं दी बशेश नजरसानी यानि एस.आई.आर दी सुनवाई दा चरण अज्जै थमां शुरु होई गेआ ऐ। पूरे राज्य च 3 जहार 234 सुनवाई केंद्र बनाए गे न। पैहले चरण च तकरीबन 32 लक्ख मतदाताएं गी सुनवाई लेई सद्देआ गेआ ऐ। इ'नें मतदाताएं दे नांs 2002 दी मतदाता सूची कन्ने मेल नेई खंदे हे। मतदाता आधार कार्ड सने 12 मानता हासल दस्तावेजें चा कोई बी जमा करोआई सकदे न पर छड़े आधार

कार्ड गै गै प्रमाण पत्र नेई मन्नेआ जाहग। निर्वाचन आयोग ने साफ चेतावनी दिती ऐ जे फर्जी जां जाली दस्तावेज जमा करना दंडने-जोग अपराध होग। राज्य दे मुख चुनांस अधिकारी मनोज कुमार अग्रवाल हो'रें दस्सेआ ऐ जे सुनवाई दिआं सब्बै तैयारियां पूरी करी लैती गेदिआं न। सुनवाई 4 जहार 500 शा मते निगरानें दी दिक्ख-रिक्ख हेठ कीती जाहग। ई.आर.ओ, ए.ई.आर.ओ, बी.एल.ओ ते निगरानें सने होरनें अधिकृत कर्मियें दे अलावा कुसै हो'र गी सुनवाई केंद्रें दे अंदर जाने दी इजाजत नेई होग। सुनवाई दे दुरान हर इक केंद्र पर फोटू दस्तावेजीकरण बी कीता जाहग।

<><><><><><>

### **Inquiry IndiGo Disruptions**

शैहरी हवाबाजी सरबन्धी महानिदेशालय - डी.जी.सी.ए दे संयुक्त महानिदेशक संजय के. ब्राह्मणे हुं'दी अध्यक्षता च जांच समिति ने इंडिगो दिएं डुआरिएं च रूकावटें बारे रपोट सौंपी दिती ऐ। देशै च बड्डे पैमाने पर डुआरिएं च रूकावटें दिएं वजहें दी व्यापक समीक्षा ते आकलन करने लेई 5 दिसंबर गी एह कमेटी खडेरी गई ही ते इन्नै कल अपनी रिपोर्ट देई दिती। इस कमेटी गी डुआरिएं दे व्यापक परिचालन च रूकावटें दिएं वजहें दा पता लाने लेई आखेआ गेआ हा।

<><><><><><>

### **Delhi Police Op Aaghat**

दिल्ली पुलिस ने ऑपरेशन आघात दे त्रीये चरण दे तैहत अज्ज 600 शा मते आरोपियें गी गिरफ्तार कीता। एह आरोपी उत्पाद शुल्क कानून, थेहारें सरबन्धी कानून, नारकोटिक

ड्रग्स, एनडीपीएस ते जुए दी रोकथाम सरबन्धी कानून दे तैहत गिरफ्तार कीते गे न। दिल्ली पुलिस दस्सेआ ऐ जे इस दरान 504 लोकें गी एहतियाती उपायें दे तैहत फगड़ेआ गेआ ते 100 शा मते बदमाश गिरफ्तार कीते गे। इस ऑपरेशन दे दरान गैर-कनूनी शराब दिआं 12 जहार शा मतियां बोतलां, 231 दोपहिया वाहन ते इक गड्डी बी बरामद कीती गई ऐ। एह ऑपरेशन, संगठित अपराध दी रोकथाम दे दिल्ली पुलिस दे लगातार ते केन्द्रित जतनें दा गै इक हिस्सा ऐ।

<><><><><><><>

### **Prakash Utsav**

खालसा पंथ दे संस्थापक श्री गुरु गोबिंद सिंह जी महाराज हुं'दी 359मीं जयंती अज्ज पटना साहिब च तख्त श्री हरमंदिर साहिब, अमृतसर च श्री हरमंदिर साहिब ते पूरे पंजाब ते देशों दे होरनें हिस्सें च बी मनाई जा'रदी ऐ। अमृतसर च श्री हरमंदिर साहिब सने देश-बदेश च बी अज्ज केई धार्मिक कार्यक्रम आयोजित कीते गे न। इस मौके उपपर श्री गुरु गोबिंद सिंह जी हुं'दी माताजी ते उं'दे साहिबजादे दी शहादत गी बी चेता कीता जा'रदा ऐ। सिक्ख धर्म दे 10में गुरु - श्री गुरु गोबिंद सिंह जी हुं'दा जन्म सन् 16 सौ 66 च श्री गुरु तेग बहादुर जी ते माता गुजरी जी हुं'दे घर पटना साहिब च होआ हा।

<><><><><><><>

### **Prez/PM/VP Greetings**

राष्ट्रपति द्रौपदी मुर्मु, उपराष्ट्रपति सी.पी. राधाकृष्णन ते प्रधानमंत्री नरेन्द्र मोदी हो'रें सिक्खें दे 10वें गुरु - श्री गुरु गोबिंद सिंह जी हुं'दे प्रकाश उत्सव पर अज्ज सबनैं गी शुभकामनां दित्तिआं न। सोशल मीडिया पर इक पोस्ट च राष्ट्रपति हो'रें आखेआ ऐ जे श्री गुरु गोबिंद सिंह जी हो'रें अदम्य साहस ते असाधारण समझदारी दे कन्नै लोकें गी धार्मिक जीन जीने लेई प्रेरित कीता। उपराष्ट्रपति सी.पी. राधाकृष्णन हो'रें श्री गोबिंद सिंह जी हुं'दे प्रकाश उत्सव पर उ'नेंगी श्रद्धांजलि अर्पित कीती ऐ। सोशल मीडिया पोस्ट च श्री राधाकृष्णन हो'रें आखेआ ऐ जे पूरा देश श्री गुरु गोबिंद सिंह जी हुं'दी दलेरी, ज्ञान ते दया भावना गी नमन करदा ऐ। उ'नें आखेआ जे श्री गुरु गोबिंद सिंह जी हुं'दा जीवन औने आहली पीढ़ियें गी सच्चाई, न्याs ते धर्म दी पालमा करने, निडरता ते विनम्रता दे कन्नै जीन जीने दी प्रेरणा दि'दा ऐ। तोआई प्रधानमंत्री नरेन्द्र मोदी हो'रें श्री गुरु गोबिंद सिंह जी हुं'दे जन्मस्थान, तख्त श्री हरिमंदिर जी पटना साहिब दी इस ब'रे दी जातरा दिआं तस्वीरां सांझी कीतीआं न। श्री मोदी हो'रें आखेआ ऐ जे श्री गुरु गोबिंद सिंह महाराज, दलेरी, दया ते बलिदान दे प्रतीक न। उ'नें आखेआ जे 10में सिक्ख गुरु हुं'दा जीवन ते शिक्षां लोकें गी सच्चाई, न्याs, धर्म ते मनुक्खी गरिमा लेई प्रेरित करदिआं रौहडन।

<><><><><><>

## PM- MKB

प्रधानमंत्री नरेन्द्र मोदी हो'र कल बड्डलै 11 बजे आकाशवाणी पर अपने महावार रेडियो कार्यक्रम “मन की बात” राहें देश-विदेश च रौहने आहलें लोकें कन्नै अपने विचार सांझे करगंन। एह् इस रेडियो कार्यक्रम दी 129मीं किश्त होग। इस कार्यक्रम दा प्रसारण

आकाशवाणी ते दूरदर्शन दे समूलचें नैटवर्क पर आकाशवाणी समाचार दी वैबसाईट ते News on AIR Mobile App पर कीता जाहग। एदे इलावा इस कार्यक्रम गी आकाशवाणी समाचार- डी.डी. न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी लाईव प्रसारित कीता जाहग। इन्ना'गै नई आकाशवाणी पर हिंदी प्रसारण दे तुरंत मगरा एहदा क्षेत्रीय भाषाएं च बी प्रसारण होग।

<><><><><><>

## **Tax Reforms**

बरा 2025 भारत दी विकास यात्रा गी परिभाषित करने आहला इक ध्याs ऐ- जेहदे च नीतियें गी विकास च ते इरादें गी प्रभाव च बदलों'दे दिक्खेया गया ऐ। इक खास श्रंखला सुधारें आहला बरा च अज्ज अस 2025 च टैक्सें सरबंधी खेतर च भारत दी प्रगति पर इक रिपोर्ट पेश करा'रदे आं। नरेन्द्र मोदी सरकार आसेया पिच्छले 8एं बरे थमां शुरु कीते गेदे ते 2025 च निर्णायक तौरा कन्नै अगगे बधाए दे कर सुधार पिच्छली बवस्था थमां इक स्पष्ट बलाs दा प्रतीक न। इस बदलाs दा मुख अधार औने आहली पीढ़ी दे जी.एस.टी सुधार न। इस बरे टैक्स प्रणाली गी 5 ते 18 फीसद दी दंड मुख स्लैब च युक्तिसंगत बनाया गया ऐ जेहदे च स्पष्ट वर्गीकरण-सखल्ला पंजीकरण ते सखल्ली पालमां शामिल ऐ।

<><><><><><>

## **OGW's Arrested**

पुलस नै कश्मीर घाटी दे शोपिया जिले थमां जन सुरक्षा कन्नू दे प्रावधानें तैहत त्रंऊ ओवर ग्राउंड वर्करें गी हिरासत च लैता ऐ। पुलस नै सोशल मीडिया दी इक पोस्ट च जानकारी दिती जे हिरासत च लैते गेदे एकड़े लोकें गी प्रदेश दी सुरक्षा खिलाफ गतिविधियें च बार-बार शामिल पाया गया। भारतीय नागरिक सुरक्षा संहिता दी दफा 170/126 तैहत उं'दे खिलाफ शुरू कीती गेदी कारवाइयें दे बावजूद ओह गैर-कन्नूनी गतिविधियें च शामिल रेह- जेहदे करी जिले च रमानदारी ते सुरक्षा दे लिहाज कन्नै ओह गंभीर खतरा बनी गेन। पुलस नै दस्सेया जे हिरासत च लैने मगरा इन्नै'गी जम्मू च कोट भलवाल स्थित सेंट्रल जेल च भेजेया गया ऐ।

<><><><><><>

### **LG-Heli Service**

उपराज्यपाल मनोज सिन्हा हो'रें घोषणा कीती ऐ जे पवित्तर शिवखोड़ी श्राईन जाने आहले श्रद्धालुएं लेई हेलीकाप्टर सेवा तौले गै शुरू होई जाग- कीजे लोड़चदे बुनियादी ढांचे दा कम्म हूँन पूरा होने दे अखीरले चरण च ऐ। एह घोषणा कटड़ा च श्री माता वैष्णो देवी युनिवर्सिटी दे 11में दीक्षांत समारोह दौरान कीती गई। उपराज्यपाल हो'रें जानकारी दिती जे कटड़ा ते शिवखोड़ी दौने थाहरें पर हेलीपैड दा निर्माण-कम्म तकरीबन पूरा होई गेदा ऐ। उ'नें आखेया जे इस हेलीकाप्टर सेवा राहें बुर्जुगें ते दिव्यांगजनें लेई इक बड़ी राहत होग।

<><><><><><>

### **Thai Cambodia Ceasefire**

थाइलैंड ते कंबोडिया ने विवाद आहले बन्ने पर लड़ाई रोकने लेई युद्धविराम समझौते पर दस्तख्त कीते न। थाइलैंड दे रक्षा मंत्री नत्थापोन नाकपानिच ते कंबोडिया दे उप-प्रधानमंत्री ते रक्षा मंत्री टी. सेहा हो'रें अज्ज थाईलैंड दे चंथाबुरी प्रांतै च सीमा चौकी पर एह समझौता कीता। दौनें मुख्यें अपने बन्ने आहली समिति दी बशेश बैठक दे दरान सांझे ब्यान पर सैहमति व्यक्त कीती। जुलाई दे संघर्ष विराम समझौते दे इस महीने दी शुरुआत च उल्लंघना दे बाद दौनें मुख्यें बशकार झड़प्पां तेज होई गेइयां हिआं।

<><><><><><>

## Israel Somaliland

सोमालिया थमां बकख होए दे इलाके सोमालीलैंड गी स्वतंत्र राश्ट्र दे तौर पर औपचारिक रूप कन्नै मानता देने आहला इज़राइल पैहला मुख्य बनी गेआ ऐ। प्रधानमंत्री बेंजामिन नेतन्याहू हो'रें आखेआ ऐ जे इज़राइल कृषि, सेहत ते नमिएं तकनीकें दे खेतर च तुरत सैहयोग बधाने दा ख्वाहिशमंद ऐ। सोमालीलैंड दे राश्ट्रपति अब्दिरहमान मोहम्मद अब्दुल्लाही होरें इस फैसले गी ऐतिहासिक करार दिता ऐ। इज़राइल दे बदेश मंत्री गिदोन सार हो'रें इक बयान च आखेआ ऐ जे दवै मुख्य, पूरे-पराते कूटनीतिक सरबंध स्थापत करने पर बी राजी होए न। एहदे च राजदूतें दी नियुक्ति ते सफारतखानें गी खोलना शामिल ऐ। तोआई, मिस्र दे बदेश मंत्री हो'रें इज़राइल दी घोशणा सने बकख-बकख मुद्दें पर चर्चा लेई सोमालिया, तुर्किये ते जिबूती दे बदेशमंत्रियें कन्नै बकखरे-बकखरे तौर पर टेलीफोन राहें गल्लबात कीती। इ'नें बदेश मंत्रियें इस फैसले दी सख्त निंदेआ करदे होई इज़राइल दी घोशणा गी खारिज करी दिता ऐ। तोआई, अफ्रीकी संघ आयोग दे अध्यक्ष महमूद अली यूसुफ हो'रें बी सोमालीलैंड गी कुसै बी मानता गी खारज करी दिता ऐ।



<><><><><><><>

## China USA

चीन ने ताइवान गी थेहार बेचने दे मामले च 10 लोकें ते अमरीका दिएं 20 रक्षा कंपनियें पर बंदिशां लाई दिती ऐ। इंदे च रक्षा कंपनी एंडुरिल इंडस्ट्रीज दे संस्थापक ते प्रतिबंधित कंपनियें दे 9 वरिष्ठ अधिकारी शामिल न। प्रतिबंधित अधिकारिणं दे चीन च दाखल होने पर बी रोक लाई दिती गई ऐ। प्रतिबंधित कंपनियें च नॉर्थरोप ग्रुमन सिस्टम्स कॉर्पोरेशन, एल-3 हैरिस मैरीटाइम सर्विसेज, ते बोइंग दी सेंट लुइस शाख बी शामिल ऐ। अमरीकी बदेश विभाग दे प्रवक्ता ने प्रतिबंधित कंपनियें ते लोकें दी चीन च मजूद संपत्तियें गी कुर्क करने ते उंदे कन्नै चीनी संगठनं दे बपार पर बंदिश लाए जाने पर सख्त बरोध दर्ज करोआया ऐ।

<><><><><><><>

## Ashes Cricket

एशेज श्रृंखला दे चौथे क्रिकेट टेस्ट मैच च इंग्लैंड ने ऑस्ट्रेलिया गी हराई दिता ऐ। इंग्लैंड ने ऑस्ट्रेलियाई जिमीं पर तकरीबन 15 बरें परैन्त टेस्ट मैच च जित हासल कीती ऐ। मेलबर्न क्रिकेट ग्राउंड च इंग्लैंड ने मेजबान टीम गी चार विकेटें कन्नै हराया। जोश टॉग ने 5 विकेटां लेइयै ऑस्ट्रेलिया दी पैहली पारी 152 रन्जें दे स्कोर पर समेटी दिती। उत्थे गै, दुई पारी च, ब्रायडन कार्स ने 4 खड्डारिणं गी आउट कीता ते ऑस्ट्रेलिया दी टीम 132 रन्जें पर ऑल आउट होई गई। इंग्लैंड ने पैहली पारी च 110 रन्ज बनाए ते दुई पारी च शुरुआती विकेटां डिग्गने दे बावजूद शानदार वापसी करदे

होई जित लेई लोड़चदे 175 रन्जें दा लक्ष्य हासल करी लैता। जैकब बेथेल ने 40 ते जैक क्रॉली ने 37 रन्जें दी शानदार पारी खेड्डी। इस श्रृंखला दा 5मां ते आखरी टेस्ट मैच सिडनी च 4 जनवरी थमां खेड्ढेआ जाहग।

<><><><><><>

## Chess

15एं बरें दे भारती शतरंज खड्ढारी गौतम कृष्णा ने फिडे वर्ल्ड रैपिड शतरंज चैंपियनशिप दे पैहले दिन शानदार प्रदर्शन कीता। उ'नें त्रै ग्रैंडमास्टरें - अलेक्जेंडर इंडजिक, अरविंद चिदंबरम ते तैमूर राडजाबोव गी हराया। उ'नें द'उं होरनें खड्ढारिएं दे कन्ने ड्रॉ खेड्ढियै वर्ल्ड रैपिड शतरंज चैंपियनशिप दे पैहले दिन कोई बी मुकाबला नेई हारेआ।

<><><><><><>

## Ind Woman Cricketer

ऑलराउंडर दीप्ति शर्मा होरें तिरुवनंतपुरम च श्रीलंका दे कन्ने त्रीये टी-ट्वेंटी क्रिकेट मैच च केईं रिकॉर्ड बनाए न। उ'नें 18 रन्ज देइयै त्रै विकटां हासल कीतीआं। ऑस्ट्रेलिया दी एलिस पेरी गी पिच्छे छोड़दे होई दीप्ति शर्मा, महिला अंतरराष्ट्री क्रिकेट च सबनें शा मते विकट लैने आहली त्रीs गेंदबाजी बनी गेइयां न।

<><><><><><>